



*Veurjaorsedisie 1993  
Jaorgang 2, nr. 3.  
Oplaoge 1400 stoks.*

# 't Herenhoentien

*'t Herenhoentien is veural bedoeld veur  
groep 1 en 2 van et basisonderwies.  
Et verschient 3 à 4 keer in 't jaor.*

## Beste kiender!

Et veurige Herenhoentien gong over  
schaese-rieden en over sporen in de sni'j,  
weten jim nog wel?

De redens (schaatsen) hej'm vanzels  
al weer veer achter in de kaaste stopt  
tot de volgende winter en sporen zuken  
gaot ok et beste as d'r sni'j ligt!

Mar doen jim wel es een speurtocht? Aj'  
een speurtocht doen moej' ok sporen  
zuken om d'r achter te kommen waor  
aj' langes moeten. Zokke sporen kun  
pielkies wezen die as in et zaand krast  
binnen, of pielkies van hoolt. Mar et  
kun ok kleurde linties of pielkies van  
pepier wezen.

Meerstal is een speurtocht alliend mar  
mooi en gezellig. Mar dat et ok wel es  
aanders gaon kan kun jim in et ni'jste  
verhael over Piepmoes lezen.

Dit keer zitten d'r twee inlegvellen in  
et Herenhoentien. Et iene is hiel groot.  
Daor staot een prachtig spullegien op.  
Et liekt wel een betien op gaanzebod.  
Hoe as et percies moet staot op et ere  
inlegvel. Daor staot trouwens ok een  
doppelstien op tekend. Die moet nog  
kleurd, uitknipt en in mekeer plakt  
wodden. As hi'j klaor is kuj' him bi'j  
et spullegien bruken. Mooi, vienen  
jim ok niet?

In et Herenhoentien staon vanzels ok  
nog een hieleboel ere dingen. Kiek  
mar es gauw...

Tot de volgende keer!



*Wat staot Piepmoes dit keer weer te  
waachten? Juf of meester moet jim  
mar gauw een keer et ni'jste verhael  
over et moesien veurlezen. Et begint  
op de twiede bladziende.*



## PIEPMOES EN DE SPEURTOCHT.

(Veurleesverhael van Sietske Bloemhoff)

Op een mooie veurjaorsdag stapt Piepmoes opgeruimd de deure uut. Et is heerlijk weer. Om Piepmoes zien kesteel henne bluiien allegere mooie bloemen. De bomen bin al een stok-henne gruuu.

Et zunnegien schient zó lekker dat Piepmoes zien mouwgies opstruupt. "Dan wo'k mooi bruun," daenkt et moesien. "As et morgen nog zok weer is doe'k de kotte broek an en gao'k d'r een dag-gien op uut. Mar vandaege wi'k eerst de tuun es even goed doen. Dan ligt die d'r temeensen netties bi'j."

Piepmoes begint te schoffelen. As dat daon is gaot hi'j de patties mooi anharken. Now en dan veegt hi'j him et zwiet van et heufd. "Now nog even et pattien naor de bos toe en dan bin'k klaor," mompelt de moes. "Dan gao'k lekker in de li'jte een glassien ranje drinken en de kraante lezen, die zal d'r intied wel wezen."

Piepmoes klauwt et pattien netties an. Mar as hi'j an de bos toe is zicht hi'j inienend wat. An een dikke boom zit een briefien vaaste. "Veur Piepmoes," staot d'r op. Piepmoes haelt et briefien van de boom en bekikt et es an alle kaanten. "Van je vrunden," staot d'r op de achterkaante. "Nuver heur," daenkt Piepmoes. "Waorum doen ze zoe'n briefien niet gewoon in mien brievebusse? Now ja, mar es lezen wat d'r is." En Piepmoes voolt de brief eupen.

"Beste Piepmoes," staot d'r te lezen. "Omdat wi'j jow zoe'n aorige moes vienen hebben we wat aorigs veur jow bedocht. As ie de rooie pielkies deur de bos volgen vien ie an et aende van de speurtocht een verrassing. Omdat ie zoe'n lieve moes binnen. Veul plezier en tot kiek!"

"Appat heur," vint Piepmoes. "As et roodbossien en de gele gouwe mi'j zo aorig vienen kun ze dat toch wel gewoon zeggen. En as ze mi'j een verrassing geven willen kun ze dat toch gewoon doen. Zo kuj' mar weer zien dat ieder besien zien eigen gewoonten het. Mar afijn, ik moet mar es kieken wat veur verrassing ze veur mi'j hebben. As et mar niet te lange duurt, want aanst begint et al gauw es duuster te wodden. Van et kraante-lezen zal buten wel niks meer kommen."

Piepmoes zet de harke henne en lopt de bos in. Bi'j een krusing wiest d'r een pielkien naor rechts. Nao een posien moet Piepmoes links of. Dan zicht hi'j weer een briefien. Daor staot in: "Ie wo'n toch nog niet muui, hen Piepmoes? Volholen, heur."

Piepmoes stapt weer veerder. Hi'j is al een hiel aende van zien kesteel of.

"'t Is mar goed da'k de bos zo goed ken en dat d'r de hieltied pielkies hangen," daenkt Piepmoes, "eers kon'k nog wel verdwelen. Waor zollen die gekke voegels die verrassing toch verstoppt hebben?"

Dan zicht Piepmoes weer een briefien. "Mooie speurtocht, niet?" staot daor in, "nog een klein aentien, lief, klein, lekker moesien, en dan bi'j d'r!"

Daor gaot Piepmoes weer. Mar hi'j lopt niet zo vlogge meer. En et liekt ok krek of daenkt hi'j hiel diepe nao, want hi'j het allemaole reenfels op et veurheufd.

"Argens klopt d'r wat niet," daenkt Piepmoes. "D'r staot wat in dat laeste briefien waor wat mit is." Piepmoes daenkt nog es dieper nao en hi'j lest et briefien nog es over. "Mooie speurtocht, niet? Nog een klein aentien, lief, klein, lekker moesien, en dan bi'j' d'r."

Wat is d'r now an de haand mit dat laeste briefien... Weten jim et?

Piepmoes daenkt en daenkt en daenkt... Inienend wet hi'j et. "LEKKER moesien" staot d'r. En dat deugt niet! Roodbossies en gele gouwen vienen moesies hielemaole niet lekker. Die eten hielemaole gien moesies. Mar d'r bin wel beesten die wél moezen eten en die moezen hatstikke lekker vienen! Katten! Klaos de kaeter bi'jglieks en Miep, Klaos zien vrundinnegien!

"Oei, oei," daenkt Piepmoes. "Wat bin'k ok een sloegerd! Klaos de kaeter en Miep. Wat bin dat toch aekelike katten. Ik moet maeken da'k vot kom, want zi'j bin vanzels die verrassing die me te waachten staot. Ik docht ok al, zoks is niks veur et roodbossien en de gele gouwe. En die bin vanzels niet in de buurt om mi'j te helpen!"



Piepmoes drijft him gauw omme en begint zo hadde as hi'j kan op huus an te draeven. En dát zien de katten vanzels.

"Moej' now toch kieken, Klaos," raost Miep. "Daor gaot oons happien! D'r achter an!"

"Hoe kan dat now," grauwt Klaos. "Et gong aanders zo goed!"

En de beide katten stoeven d'r vandeur, achter Piepmoes an.


"Piep, piep, help, help," piept et moesien, "de katten zitten me nao! Piep, piep, help, help!"

Vlakbi'j in een hoge boom zit de doeve. Hi'j zit wat te sloegen as hi'j inienend Piepmoes piepen heurt. Hi'j het mitien in de gaten wat d'r an de hand is. Piepmoes is in geveer! Gauw vligt hi'j naor de moes toe. "Klim op mien rogge, Piepmoes," koerkt de doeve, "Klim op mien rogge, zo hadde aj' kunnen." De doeve vligt nog mar krek mit Piepmoes vot as de katten d'r an kommen.


"Wéér mis," krijsen ze, "now moe'n we wéér genoeg enemen mit een koemegien melk. Wéér gien stokkien vleis! Bah!" Jammerende en mierkende gaon ze op huus an. Wat hebben die katten de smoor in!

En Piepmoes? Die drinkt tegere mit de doeve nog een lekker glassien ranje in de laeste zunnestraolen van die dag. De kraante kan Piepmoes morgen ok nog wel lezen.

### ZUUK DE ACHT VERSCHILLEN:




## VEURIAORSKLEURPLAETE



Wie maekt een mooie zwat-wit-tekening  
veur et zommernommer van et  
Herenhoentien? Stuur die mar naor et  
gemienteuus van West-Stellingwarf,  
Rozenstraat 1, 8471 KL Wolvege, t.n.v.  
Saskia Douma. Wie wet komt jow  
tekening in dit kraantien. Succes!

### DE ACHT VERSCHILLEN:



't Herenhoentien wodt uitgeven deur de  
Intergemientelike Begeleidingsgroep  
Hiemkunde in Oost- en West-Stellingwarf.

An dit Herenhoentien warkten Jan de  
Vries, Bart Beltman, Saskia Douma en  
Sietske Bloemhoff mit.




## Et maeken van de dobbelstien.

Kleur eerst de dobbelstien zo mooi meuglik en knip of prik him dan uut.

Vouw de stippellijnen naor binnen toe omme en plak de dobbelstien in mekeer.

Ie kun now et spel speulen gaon.



## SPELREGELS

5. Twie vakkies achteruut
6. Gooi nog een keer
9. Twie vakkies veuruut.
14. Gao naor nr. 20
18. Gooi nog een keer.
19. Gao veerder aj' 2 of 4 gooid hebben.
23. Twie vakkies achteruut
26. Twie vakkies veuruut.
27. Klaos stuurt je weeromme naor 21.
31. Aj' een lietien zongen hebben meuj' weer veerder.
32. Gooi nog een keer.
35. Slao een beurt over.
40. Ie meugen naor 45 gaon.
41. In de sloot! Gao veerder aj' 1 gooid hebben.
44. Vertel een moppien, dan meuj' veerder.
49. Gao weeromme naor 45.
51. Slao een beurt over.
52. Gooi nog een keer.
53. Gao naor nr. 59
57. Twie vakkies veuruut.
58. Twie vakkies achteruut.

Wie et eerste bi'j et kesteel van Piepmoes is, het wunnen!



